

Obrazovni sistem u Finskoj: Kraj pisanim slovima

Djeca u Finskoj više neće učiti pisana slova što je opravdano potrebom zadržavanja koraka sa svijetom tehnologije.



„Svoje pamćenje prepustili smo mobitelima i kompjuterima. Sposobnost i potrebu da govorimo prepustili smo mobitelima na kojima šaljemo nekakve pseudoporuke u kojima više nema riječi, nego samo kratice. Sve to nužno vodi do pretvaranja ljudi u idiote, a podsjećam na to da je svaki Helen Ilijadu i Odiseju znao napamet. Mnogi danas ne znaju ni svoj telefonski broj napamet ili nisu sposobni upamtiti tri rečenice“, upozorava književnik Karahasan.



**Islamska zajednica Bošnjaka u
Švedskoj**

Adresa: Slättervägen 44, 461 61 Trollhättan;
Tel. 076 310 24 47 / 0520-499064

www.izb.se
Potražite nas i na facebook-u
Islamska zajednica Bošnjaka u
Švedskoj

S A D R Ź A J

- Impresum
- Uvodnik za 11. broj

Aktivnosti IZBUŠ-a

- Održana skupština IZB u Švedskoj

Džematske aktivnosti

- Malmö: Gost Aljo-ef. Cikotić
- Stockholm: Održana skupština
- Helsingborg: Zajednički ručak
- Växjö: Otvorene nove prostorije
- Halmstad: Časovi religije u džematu
- Hutba: Ljetna destinacija, za odmor i ibadet
- Kraj pisanja rukom, izvor: Al Jazeera


POZIV NA SARADNJU

Oglasite se i Vi u Biltenu IZB u Švedskoj!

Javite nam se sa vašim tekstom,
prijedlogom, primjedbom i sugestijom.

e-mail: bilten@izb.se

www.izb.se



BILTEN

Informativno glasilo

Islamske zajednice Bošnjaka u
Švedskoj

GLAVNI UREDNIK

Idriz-ef. Karaman
glavni imam

IZVRŠNI UREDNIK

Almedin-ef. Spahić

REDAKCIJA:

Savjet glavnog imama:
Nezir-ef. Špiodić
Smajo-ef. Šahat
Elvedin-ef. Bešlija

SARADNICI U OVOM BROJU:

Jasmin Dervišević, sekretar
Emir Žiško, Landskrona
Merzuk-ef. Hadžirušidović, Stockholm
Benjamin-ef. Dučić

Uvodnik za 11. broj Biltena IZB u Švedskoj

U suri En-nisa, 59. ajet, Allah, dž.š., kaže:

„O vjernici, pokoravajte se Allahu, Poslaniku i pretpostavljenim vašim. A ako se u nečemu ne slažete, to Allahu i Poslaniku prepustite, ako u Allaha i Onaj svijet vjerujete! Tako vam je bolje, a i posljedice su ljepše.“

Muhamed, a.s., je rekao:

„Ko mi bude pokoran, taj je pokoran Allahu, a ko nije pokoran meni, taj nije pokoran ni Allahu. A ko bude pokoran pretpostavljenom, taj je pokoran meni, a ko nije pokoran pretpostavljenom, taj nije pokoran ni meni.“

U proteklom mjesecu održana je Skupština Islamske zajednice Bošnjaka u Švedskoj, kao i skupštine u velikom broju naših džemata. Ovi skupovi pokazali su zavidan nivo zrelosti i jedinstva naše Zajednice. Period *bavljenja sobom*, hvala dragom Bogu, je iza nas. Sve se više bavimo zadacima radi kojih i postojimo. Pokazali su to izvještaji za prošlu, ali i planovi i budžeti za ovu godinu.

Ipak, postoje džemati i pojedinci u njima, koji još uvijek žive u nekom svom svijetu i svjesno, ili nesvjesno, opstruiraju i tako usporavaju naš hod. Ušli su u *kolo* (neki doduše nisu ni to), a ne znaju, ili neće da *igraju* kako treba.

Zbog toga se porukama ajeta i hadisa s početka ovog Uvodnika trebamo iznova vraćati, naći svoje mjesto u Zajednici i unaprijediti njen rad, ili ga makar ne opstruirati, svjesno ili nesvjesno, gotovo da je svejedno.

U tom smislu preporučujemo još jedan hadis:

„Ja garantiram kuću u donjem dijelu Dženneta onome ko ostavi raspravu, pa makar bio i u pravu. Garantiram kuću u sredini Dženneta onome ko ostavi laž, čak i u šali. Garantiram kuću u najvišem dijelu Dženneta onome ko uljepša svoje ponašanje.“



Idriz-ef. Karaman
glavni imam

Idriz-ef. Karaman

www.izb.se

U Jönköpingu održana skupština IZB u Švedskoj



U subotu, 21. marta 2015. godine u gradu Jönköping održana je redovna izvještajna Skupština Islamske zajednice Bošnjaka u Švedskoj u prisustvu 59 delegata iz 24 džemata, te svih članova Izvršnog odbora IZBUŠ. Skupštinom je predsjedavao predsjednik Džemata Borås Jasmin Fočo.

Na početku Skupštine delegatima su se obratili Hazim Avdić ispred „Merhameta“ Švedske, te Haris Delić ispred omladinske organizacije Bemuf.

U radnom dijelu Skupštine podneseni su izvještaji o radu i finansijama, kao i izvještaj Revizone komisije. Svi izvještaji su

usvojeni, nakon veoma konstruktivne diskusije.

U istoj atmosferi predstavljeni su i usvojeni plan rada i budžet za tekuću godinu.

Iako je ovo bila izvještajna Skupština, zbog povlačenja dvojice rezervnih članova Izvršnog odbora, na njihova mjesta izabrani su novi članovi.

Na kraju zasjedanja predsjednik IZBUŠ Mustafa-ef. Šetkić, u ime IZBUŠ, uručio je prigodan poklon Jasminu Foči u znak zahvalnosti za dugogodišnji angažman u Izvršnom odboru i uređivanje internet stranice, te se zahvalio Džematu Jönköping za gostoprimstvo i odličnu organizaciju.

I.K.



Džemat Malmö: Druženje sa Aljom-ef. Cikotićem



U četvrtak, 19.marta 2015.godine, u prostorijama džemata u Malmeu, predavanje je održao Aljo ef. Cikotić, rodom iz Trpezi, koji je inače mlađi brat bivšeg ministra odbrane BiH Selme Cikotića. Efendija Cikotić je govorio o iskrenim vjernicima i čovjeku kao Božijem halifi na zemlji, kojeg je Allah dž.š. stvorio dajući mu uputu.

Istakao je da je čovjek sastavljen od dvije komponente: duše i tijela. Tijelo je od zemlje, vraća se zemlji i liječi se proizvodima koji rastu iz zemlje. Duša stremlji visinama i ako želimo da i ona bude zdrava, moramo je liječiti duhovnom spoznajom i ibadetom. Najvrijednija rečenica koju čovjek može izgovoriti, rekao je

Cikotić, sastoji se samo od tri harfa: elif-a, lam-a i ha. To je „La ilahe ilellah (Nema drugog boga osim Allaha)“.

U nastavku izlaganja predavač je govorio i o ulozi džemata. „Da bismo ostali jaki, snažni, stameni“ – istakao je Cikotić- „moramo se držati džemata. “Uloga džemata je nemjerljivo vrijedna u očuvanju naše vjere, identiteta, jezika, kulture i drugih naših osobenosti.“

Druženje je proteklo u prijatnoj atmosferi. Prisutni su uživali slušajući predavača koji je s fascinantnom lahkoćom prenosio veoma bitne poruke džematlijama.

Emir Žiško

.....



Džemat Štokholm: Održana godišnja skupština



U nedjelju, 29. marta 2015. god. (09.džumadel-uhra 1436.) sa početkom u 16 sati u novim prostorijama Zajednice - novoj džamiji održana je XXII redovna džematska godišnja Skupština, a prva u novoj džamiji. Sjednici, koja je ove godine i izbornog karaktera, se odazvalo 147 članova. Na Skupštini su usvojeni izvještaji o radu i finansijama te plan rada i budžet Zajednice za tekuću godinu. Potom se pristupilo glasanju za predloženih 15 kandidata Upravnog odbora a za Nadzorni odbor nije ni bilo više od tri prijedloga te je time taj odbor imenovan i bez glasanja. Za članove i supleante Upravnog odbora izabrani su:

1. Alić Mevlija
 2. Bektešević Mirsad
 3. Delić Enes
 4. Gigović Eniz
 5. Muhović Ragib
 6. Obuća Miralem
 7. Poljo Halima
 8. Šetkić Mustafa
- Supleanti (zamjenici):

1. Jašarević Fadila
2. Zupčić Selmir

Imam Merzuk ef. Hadžirušidović je član džemata po položaju.

Zahvaljujemo se članovima na odzivu, kandidatima na iskazanoj volji da pomognu džematu a izabranim kandidatima na zasluženom povjerenju ovogodišnje skupštine. Dan prije, i omladina džemata - BEMUF Stockholm, održali su svoju godišnju skupštinu, usvojili izvještaje i plan rada te imenovali novi odbor na mandat od godinu dana. Potom su imali i konstituirajuću sjednicu, i za predsjednika ponovo izabrali Amara Šetkića. I njima čestitamo i želimo puno uspjeha u okupljanju i aktivnostima omladine.

M.H.

PITANJA I ODGOVORI

Pitanje:

Esselamu alejkum!

Molim Vas recite mi kako da postupim sa sinom koji ide u kladionicu i igra igre na sreću. Šta da učinim da bih ga uspio spasiti tog poroka?

Prof. dr. Enes Ljevaković,
fetva-i-emin



Pitanja možete slati na mail:

pitanja@rijaset.ba

Odgovor:

Esselamu alejkum!

Klađenje može prerasti u neku vrstu ovisnosti, pa je još teže raditi na odvikavanju i odvrćanju od te pošasti. U svakom slučaju, savjetujte ga na lijep način da se izvuče iz te ovisnosti koristeći se i metodom popunjavanja vremena sportom i drugim korisnim djelima. Nastojte mu iznaći dobro društvo koje će ga povesti u hairli akcije. Također, upućujte dove Allahu da ga uputi na pravi put i sačuva tog i drugih belaja. U tom smislu lijepo je da podijelite nešto sadake s tim nijetom. Upućivanje djece na hajr je trajan zadatak i misija roditelja. Proanalizirajte malo i vlastito ponašanje i ambijent u kojem dijete boravi, možda se i tu može nešto popraviti. Neka Vas Allah u tome pomogne.

Džemat Helsingborg: Zajednički ručak za polaznike vjerske pouke



Odgoj naše djece i omladine, razvijanje njihove ljubavi prema islamu, mesdžidu, prema mektebu i učenju cilj je skoro svakog roditelja i muallima.

Neki roditelji na tom putu pokažu veću aktivnost i želju pa svoje dijete u mekteb upišu, trudeći se da ga što češće na vjersku pouku dovode. A za izdvojeno vrijeme i uloženi trud na tom putu, sigurno se nikada neće pokajati. A kako bi se roditelj pokajao kad njegovo dijete u mektebu uči o vjeri u Jednog Boga, o Allahu Uzvišenom koji dobra djela nagrađuje, a ona u mladosti učinjena još većom nagradom. U mektebu uči o dobročinstvu majci i babi, o namazu i Kur'anu, o ljubavi i lijepom odnosu prema drugim ljudima, i muslimanima i nemuslimanima.

Lijepo odgojena djeca i omladina najveći su ukras jedne porodice i zajednice. Oni donose poseban hajr, beričet i blagodat zajednici. Tako se islamskim predajama navodi da Allah, dž.š., odgodi kaznu nekom mjestu, samo zato što dijete u mektebu Fatihu prouči. A pored učenja, u mektebu se druže, igraju, upoznavaju, a njihovi roditelji, također, stiču nova poznanstva i nove prijatelje.

U tom cilju džemat Helsingborg sa svojim imamom svakog zadnjeg vikenda u mjesecu organizira mektebsku pouku u mesdžidu za svu djecu, i za onu koja su upisana u Helsingborgu, ali i onu koja mekteb pohađaju u punktovima Åstorp i Ängelholm.

Tako smo ove nedjelje, 29. marta, nakon završene mektebske nastave i podne-namaza, naše polaznike vjerske pouke počastili zaslužnim ručkom. Lijepa atmosfera, druženje djece i roditelja pokazali su nam da su ovakve aktivnosti jako pozitivne i potrebne, i djeci i roditeljima. Posebna radost je što su nam nakon ručka djeca zajedno učila dovu poslije jela.

Uz Božiju pomoć, Džemat planira nastaviti sa ovom praksom i sličnim aktivnostima, jer omiliti našoj djeci džamije i mesdžide, omiliti vjeru i poučiti ih vrijednostima i ljepotama iste, najveći je naš cilj, zadatak i izazov.

Molim Gospodara svega, Svemogućeg da nam svima pomogne na tom putu! Amin!

Nezir ef. Špiodić

Džemat Växjö: Obilježavanje 10 godina postojanja i useljenje u nove prostorije



U nedjelju, 1. marta 2015. god., u džematu Växjö, upriličen je program u povodu obilježavanja deset godina od osnivanja BIZV, kao i proklanjanje novih prostorija džemata. Veliki, dugogodišnji rad i zalaganje džematlija i imama ovog džemta je krunisan novim, lijepim i funkcionalnim prostorijama, koje će ako Bog da u budućnosti, omogućiti jačanje i veći napredak džemata.

Ovu svečanost su učenjem Kur`ana, mevluda i ilahija uljepšali naši imami iz drugih džemata Švedske, kao i džematski hor ilahija i kasida. U svom obraćanju gl.imam, Idriz-ef. Karaman je pohvalio dosadašnji rad džemata, te kroz kur`anske i hadiske poruke podstakao prisutne na još veći angažman u cilju postizanja još boljih rezultata. Nakon ikindije-namaza za sve prisutne je uz lijepo druženje upriličen i ručak koji su pripremile vrijedne džematlijeke.

Programu je prisustvovao veliki broj džematlija ali i gostiju iz drugih gradova Švedske kao i iz naše domovine Bosne i Hercegovine.

Benjamin-ef. Dučić



Džemat Halmstad: Održani časovi religije u prostorijama džemata za dva razreda Andersberg škole

Dana 04. marta 2015. god., u prostorijama džemata u Halmstadu održana su dva redovna časa religije, za pete razrede Andersberg škole.

U saradnji sa učiteljima i roditeljima uspješno je u proteklom periodu realizovano pet posjeta džematu, različitog uzrasta djece. A posljednje do sada posjete ove vrste organizovane su na način da je imam džemata Almedin-ef., učenicima održao u prostorijama mektebske učionice dva redovna časa religije, i tom prilikom govorio o Islamu i islamskom učenju i odgovarao na pitanja koja su djeca imala priliku postaviti. Te prezentovao rad džemata, naše Zajednice i ukratko predstavio život jednog imama u Švedskoj, pred kojim su mnoge zadaće, prilike i izazovi.

A.S.



HUTBA: Ljetna destinacija, za odmor i ibadet

Cijenjena braćo i sestre, draga omladino



Hatib:
Almedin-ef. Spahić

Već s početkom nove godine mnogi od nas počinju da razmišljaju o ljetnom odmoru, prelistavamo kalendar i razmišljamo o terminu za godišnji odmor, pa i destinacijama gdje provesti odmor od nekoliko sedmica. Jedni od nas zakazuju skupe destinacije širom svijeta, drugi razmišljaju o odlasku u domovinu i obilasku porodice, treći ostaju u svojim kućama, itd.

I ove godine razmišljamo o ramazanu koji slobodno možemo reći ima određenu poteškoću i napor u ljetnom periodu, iako sama ljepota tog mubarek mjeseca i ibadet u njemu učini da zaboravimo na te poteškoće i nadamo se najljepšim nagradama od Milostivog i Samilosnog.

Upitajmo se već danas, a zašto da ne, da jedna od mogućih naših destinacija ovog Ramazana bude Saudijska Arabija?!

Uzvišeni Allah dž.š. u Kur'anu kaže: "Hadždž i umru radi Allaha izvršavajte". (El-Bekare, 196)

U toku ovog Ramazana možemo provesti najljepše trenutke u svom životu i ibadetiti na mjestu gdje je to činio naš Poslanik, s.a.v.s., i njegovi uzoriti ashabi. Ovo je idealna prilika da dio našeg godišnjeg odmora iskoristimo za obavljanje umre.

A šta je to umra? Umra je poseban ibadet koji se sve više upražnjava i kolektivno organizira. Donedavno je shvatano da se to samo obavlja u sklopu hadždža. O njemu se veoma malo zna u našem narodu, pa čak i od strane onih koji su obavili hadždž i umru. Također, literatura o umri veoma je oskudna, pa ćemo se u današnjoj hutbi posjetiti i naučiti o ovom ibadetu, a možda i odlučiti da obavljam u svom životu.

Umra jezički znači „zijaret“ ili posjeta. U predislamskom dobu riječ „el-umretu“ se odnosila samo na posjetu Kabi. U šerijatskom značenju umra je zijaret tj. posjeta Kabi na poseban način, uz oblačenje ihrama, obavljanje tawafa, sa'ja, te brijanje ili kraćenje kose. Nakon ovoga slijedi izlazak iz zabrana koje iziskuje nošenje ihrama.

Put na umru ili na hadždž je jedinstveno putovanje u cijelom svijetu a posebno u pogledu svjetskih putovanja i ekskurzija. Na ovom putovanju je obnavljanje ugovora sa Allahom, dž.š., i potvrđivanje obaveze preuzete u ezelu. U svim navedenim obredima živo je i sjećanje na Ibrahima a.s., njegovu suprugu Hadžeru, njihovog sina Ismaila, a.s., kao i na Poslanika, s.a.v.s., i njegovu cjelokupnu porodicu.

Hanefijski mezheb, kome i mi u našoj Zajednici pripadamo smatra umru kao pritvrđeni sunnet i mustehab (pohvalno) ju je često obavljati i veliki sevab, tog su mišljenja i malikije, dok drugi kažu da je ona farz'ajn jedanput u životu.

Ibn-Madže prenosi da je Poslanik s.a.v.s. rekao: „Hadždž je propisan, a umra je dobrovoljna!“, zatim prenosi se da je Muhamed s.a.v.s. rekao: „Od umre do umre Allah, dž.š., briše sve eventualne grijeha, a za kod Allaha primljen hadždž, nema druge nagrade osim Dženneta.“ Hadždž je sastavni dio vjere, peti islamski šart i on je obaveza svakom zdravom, punoljetnom i imućnom muslimanu i muslimanki da obavi jednom u životu. Kada je Akra' b. Habis, r.a., o tome upitao Poslanika s.a.v.s. on mu je rekao: „obavezan je samo jedanput u životu, a ko učini više puta to je dobrovoljno.“

Od Ibn Abasa, r.a., prenosi se da je Allahov Poslanik, a.s., obavio četiri umre u svom životu, i to: „Umretu-l-Hudejbije“, „Umretu-l-Kada“, „Umretu-dž-Dža'rane“, i umra zajedno sa Oproštajnim hadždžom. Umra se može obavljati u toku cijele godine, u svakome mjesecu. Dakle, ihrami (hadžijska odjeća) se mogu obući u svako vrijeme sa nijetom umre. Izuzetak od ovoga su, prema Ebu Hanifi, r.a., Dan Arefata i četiri dana poslije Arefata, jer su to dani predviđeni samo za obavljanje hadždža. Obavljati umru u tom periodu je mekruh tahrimi (izuzetno pokušeno djelo). U prilog ovom ide predaja u kojoj El-Bejheki bilježi da je Aiša, r.a., rekla: „Umra se obavlja tokom cijele godine, osim u četiri dana: na dan Arefata, prvi dan Kuranskog bajrama i dva dana nakon toga.“

Zbog čega rekosmo da je to jedna od najboljih svjetskih destinacija? Mnogo je toga što bi smo mogli spomenuti da bi smo opravdali ovu tvrdnju, a spomenut ćemo samo neke momente i mogućnosti.

Obaviti namaz u džematu umjesto u svojoj kući još u mektebu smo učili da je vrednije 27 puta, a obaviti jedan namaz u haremu (prostoru oko) Kabe je vrednije 100.000 puta, a u Poslanikovo, s.a.v.s., džamiji 1000 puta vrednije nego na bilo kojem drugom mjestu na zemlji.

S obzirom, da je i ove godine Ramazan u ljetnom periodu i vremenu godišnjih odmora, spomenut ćemo jednu predaju i događaj iz vremena Poslanika, s.a.v.s.:

Umra u ramazanu ima posebnu nagradu. Umra u ramazanu vrijedi kao hadždž sa Allahovim Poslanikom, s.a.v.s.!

Od Ibn Abbasa, r.a., prenosi se da je kazao: "Kada je Allahov Poslanik donio odluku da obavi hadždž, jedna ashabijka je kazala svome mužu: 'Omogući mi da idem na hadždž sa Allahovim Poslanikom.' Kazao je: 'Nisam u mogućnosti da ti obezbijedim (da obaviš) hadždž sa Poslanikom.' Kazala je: 'A tvoja deva koja nam služi za nošenje vode s kojom se zalijevaju usjevi?' 'Na toj devi ćemo se u putu na hadždž smjenjivati ja i sin', rekao je. 'A tvoja druga deva?', upitala je. 'Ona je uvakufljena za borbu na Allahovom putu', odgovorio je. 'Prodaj svoje datule?', ponovo je upitala. 'Te datule su moja i tvoja hrana od koje preživljavamo', odgovorio je. Kada se Allahov Poslanik vratio iz Mekke (sa hadždža), ta žena je poslala svoga muža Allahovom Poslaniku i kazala: 'Poselami Allahovog Poslanika od mene i upitaj ga šta je ravno hadždžu (obavljenim) sa Allahovim Poslanikom.' Nakon toga njen muž je došao Allahovom Poslaniku i kazao: 'Moja supruga ti šalje selam i ona je tražila od mene da joj omogućim (da obavi) hadždž sa tobom, pa sam joj kazao: 'Ja ne mogu da ti obezbijedim (sredstvo) na kojem ćeš obaviti hadždž.' Potom mi je kazala: 'Daj da obavim hadždž na tvojoj devi', pa sam kazao da je ta deva uvakufljena za borbu na Allahovom putu (džihad). Kazao je Allahov Poslanik: 'Kamo sreće da si to učinio, to bi bilo na Allahovom putu.' Potom me je pitala za svoju drugu devu, pa sam joj kazao da ćemo se ja i sin smjenjivati jašući tu devu na putu. Potom mi je kazala: 'Prodaj svoje datule', pa sam kazao da je to naša hrana. Na to se Allahov Poslanik nasmijao čudeći se njenoj želji da obavi hadždž. Ona mi je naredila da te pitam šta je ravno hadžu (obavljenom) sa tobom. Kazao je Allahov Poslanik: 'Prenesi joj selam od mene i kaži joj da je umra u ramazanu ravna hadždžu sa mnom.'

Napominjem radi ispravnog shvatanja ovog hadisa, da se ovdje govori samo o vrijednosti umre u ramazanu, a nikako o tome da onaj ko to učini nije obavezan da obavi hadždž.

Kao i na svakoj destinaciji na koju čovjek putuje razmišlja šta ću tamo vidjeti?

Imajući u vidu da je sve od tamo počelo i mi ćemo početi od najznačajnijih znamenitosti Mekke. Teško je naći riječi kojima bi mogli opisati našu želju i doživljaj kada bi smo se približili Kabi i došli na mjesto koje je Allahu najdraže na dunjaluku i mjestu prema kojem se okrećemo dok obavljamo namaz. Da na tom mjestu ibadetimo i odmaramo.

Doći do mezara Ismaila a.s. i Hadžere koji se nalaze u Hidžru, posjetiti brdo spomenuto u Kur'anu, koje se zove Sevr. Brdo koje je bilo sklonište Poslanika, a.s., i Ebu Bekra, r.a., kada su krenuli prema Medini tj. činili hidžru.

Posjetiti mjesto na kojem je počela objava Kur'ana, koje se zove Hira'. Doći do mezarja Hadžun ili el-Mualla smještenom na sjevernoj strani Mekke u čijoj blizini je mezarje po imenu Benu Hašim, u njemu su pokopani djedovi Poslanika s.a.v.s., njegov amiđa, majka Amina, supruga Hatidža, r.a.. tu je i mezar Abdullaha b. Zubejra i njegove majke Esme bint Ebi Bekr, r.a.

Posjetiti nekoliko značajnih mesdžida kao što su Mesdžidu-l-Bej'at (mjesto gdje su ensarije dale prisegu Poslaniku, a.s., na vjernost), Mesdžidu-t-ten'im (mjesto gdje je Aiša, r.a., nakon Oproštajnog hadždža sa Poslanikom, a.s., zanijetila umru), Mesdžid Kuba (džamiju koju je prema predajama Poslanik s.a.v.s. sagradio za tri dana, i mjesto gdje obavljen namaz je u nagradi obavljane umre) itd.

Posjetiti grad Poslanika, s.a.v.s., Medinu, mjesto gdje se nalazi Poslanikova, s.a.v.s., džamija i mjesto gdje poslanik Muhamed, s.a.v.s., sa svojim ashabima gradio prvu državu i uspostavio prvi državni Ustav.

Običi mjesta gdje su muslimani vodili prve bitke na Uhudu i Hendeku. Posjetiti mezarje Beki'a el Garkad, gdje su ukopani mnogobrojni ashabi, itd.

Više puta smo spomenuli posjetu različitim mezarjima, braćo i sestre, ovo putovanje nije ibadet i obilazak mezarja. Posjetiti mezarja ovih istaknutih ličnosti, znači susresti se s njima, nazvati im selam, prisjetiti se njihovog početka, doprinosa Islamu i našeg emaneta prema vjeri.

Poslanik, s.a.v.s., nas je učio da kada prolazimo pored mezarja da umrlima nazivamo selam. Rekao je Božiji poslanik Muhamed, a.s.: „Posjećujte vaše umrle i nazivajte im selam, jer vi u njima imate ibret (pouku).“ Od Nafia se prenosi da Ibn Omer ne bi nikada prošao pored nekog kabura, a da ne bi stao i nazvao selam umrlom. Doista, čast je velika nazvati selam nabrojanima i mnogobrojnim ashabima.

Mustehab je posjetiti kabur Allahova Poslanika, s.a.v.s., i posjetiti kabure Ebu Bekra, r.a., i Omera, r.a., koji se nalaze u Medini, u džamijskom haremu Poslanikove džamije. Shodno hadisu: „Ko posjeti moj kabur, zaslužio je moj šefa'at (zauzimanje na Sudnjem danu)“ i „ko me posjeti poslije moje smrti kao da me je posjetio dok sam bio živ.“

Vjerujem da u našim srcima nakon ovih riječi postoji želja da naša već ovogodišnja destinacija, bude Mekka i Medina, mjesto za odmor i ibadet.

Činimo dovu Uzvišenom Allahu, dž.š.. da ovo skromno kazivanje bude od koristi svima nama, da se zainteresujemo i za ovu vrstu ibadeta i obavljanja Umre, te da ukabuli naše ibadete i uvede nas u Dženneti Firdevs! Amin

.....

Kada je jedna osoba bolesna i kada se nađe u bolnici:

- može biti pogođena žalošću.
- može se osjećati uznemireno.
- može se osjećati usamljeno i napušteno.
- može se osjećati bespomoćno.
- može imati poteškoća da svoja osjećanja iskaže svojim najbližim i osoblju u bolnici.

KÄNNER DU TILL
DEN ANDLIGA VÅRDEN
PÅ SJUKHUS FÖR
MUSLIMER?

MUSLIMSKSJUKHUSKOORDINATOR.SE

U takvoj situaciji javljaju se slijedeća pitanja:

- Imaju li se sa kim podijeliti ova osjećanja?
- Ima li neko ko će razumjeti moju tugu i bol?
- Ima li neko ko ima sabura da me sluša?
- Ima li neko da samnom popriča?

Bolesnici muslimani koji žele da ih posjeti imam imaju slijedeće mogućnosti:

- Da ih posjeti imam koji govori njihov maternji jezik;
- Da ih posjeti imam koji pripada njihovoj kulturi i tradiciji

Obrazovni sistem u Finskoj: Kraj pisanim slovima



Obrazovni sistem u Finskoj smatraju jednim od najboljih na svijetu, no inicijativa koja je ovih dana pokrenuta u toj sjevernoj europskoj državi mnogima se učinila vrlo neobičnim, pa i potencijalno opasnim eksperimentom.

Najavljeno je da finska djeca od iduće godine više neće učiti pisana, nego samo tiskana slova. Obrazloženo je to potrebom zadržavanja koraka sa svijetom digitalne tehnologije i interneta te boljeg formalnog i lakšeg neformalnog obrazovanja.

Vremena u kojem se u školama posebno podučavala i vještina lijepog pisanja, tzv. krasopis, davno su prošla, no definicija pismenosti podrazumijeva poznavanje čitanja i pisanja, ali i razumijevanja pročitano.

„Iskreno – ova vijest me šokirala. To je još jedna u nizu inicijativa koje vode prema idiotizaciji čovjeka i njegovom pretvaranju u stroj koji opslužuje druge strojeve. Ljudi koji su tu inicijativu pokrenuli očigledno ne shvaćaju ništa o prirodi jezika i ne zanimaju se nimalo za prirodu čovjeka“, prva je reakcija književnika Dževada Karahasana na vijest iz Finske.

Karahasan je jedan od književnika koji je ostao vjeran olovci i papiru, pa svoja djela – bilo da se radi o pripovjednoj prozi, dramama ili esejima, a posebno „ono što mu je bitno“ – piše isključivo rukom.

„Sve to zavisi od odnosa prema tekstu, odnosno od prirode teksta koji pišem. Mogu direktno u mašinu, tj. u kompjuter napisati stručni rad, ali komad pripovjedne proze, drame, eseja koji mi je važan mogu pisati jedino rukom. Imajte na umu da mi formu možemo misliti samo tijelom, odnosno rukom“

Podsjeća i kako je „kultura počela pisanjem“, pa mu je finska inicijativa dokidanja pisanja „objava kraja kulture, kraja čovjeka kao duhovnog bića“.

Pismo doživljava evoluciju

Svakodnevna uvjerenja sa studentima o slovima - pisanim ili tiskanim, velikim i malim - ima dr. sc. Ljudmil Spasov, redovni profesor na Katedri za makedonski i južnoslavenske jezike Filološkog fakulteta u Skoplju.

„Govore mi kako im je sve to previše ukrasno, sve više vremena im oduzima, a ja se pozivam na pravopis, jer tamo piše kako izgledaju pisana slova i kako se pišu“, kaže Spasov.

Svjestan je, kako navodi, da „pismo doživljava evoluciju i da je kaligrafija sada više umjestnost nego praksa“.

„Kaligrafska slova nekad su bila potrebna u povijesti kad su se ljudi služili slovima i pismima, kad su trebali spremati posebno pismo i poslati ga u neku administraciju, grofu ili feudalcu. Nekad je to bilo normalno, ali se vremenom ukinulo to lijepo pisanje. U praksi danas ljudi miješaju slova i služe se nekim srednjim rješenjima koja su im praktična. Ljude ipak treba upoznati s time, pogotovo mlade koji uče pisati“, navodi Spasov.

Korištenje pisanih slova, osim potrebe, smatra i umijećem, ali je i svjestan kako korištenje kompjutera i drugih pomoćnih sredstava često dovodi do toga da ljudi „u jednom trenutku zaborave pisati“. Ipak, raduje ga jedna pojava koja se vraća u živote ljudi.

„Svake godine od kolege iz Finske dobijam razglednicu za Novu godinu pisanu rukom. To smatram kao poseban znak pažnje. Osim nje, dobiješ još samo dvije-tri pisane rukom. Ranijih godina bila ih je hrpa. Danas se smatra posebnom gestom kad dobijete tako nešto, mnogo je rjeđe nego prije i sad je to kao ekskluziva“, ukazuje Spasov.

Opasnosti krivotvorenja

I psihologu grafologu Jovanu Krstiću, stalnom sudskom vještaku za grafologiju Ministarstva pravde Srbije, vijest iz Finske je – nevjerovatna. Priču usmjerava na neophodnost stavljanja potpisa na dokumente, ali i većom opasnosti od krivotvorenja.

„Čudi me da Finci tako nešto rade, jer kako će neko da potpiše neki dokument? Kao veštak grafolog mogu reći da štampan rukopis svako može da falsifikuje, lako može da se falsifikuje i potpis, jer nema pokazatelja od identifikacionog značaja koji imaju svoju težinu i na osnovu kojih se može doneti neko konkretno validno mišljenje da je taj potpis falsifikovan“, ukazuje Krstić.

Prema njegovom mišljenju, Finskoj slijede veliki problemi ako ne budu razmišljali o mogućnosti zloupotreba ukidanja pisanih slova. Osim toga, otvara se i problem postavljanja definicije pismenosti, odnosno tko su pismeni, a tko nepismeni ljudi.

„Naše javno mnjenje nema jasnu predstavu o tome ko je pismen, a ko nepismen čovek. Pismena je ona osoba koja zna da pročita tekst i da ga interpretira. Onaj ko to ne zna je nepismen. Danas imate priučene ljude koji nijedan dan nisu išli u školu, ali ih je neko naučio da se potpišu. Naravno da oni nisu pismeni. Oni samo znaju da se potpišu, ali nisu pismeni“, ukazuje Krstić.

Himna ruci

Na kraju, ukazujući na nužnost pisanja rukom književnik Karahasan dodaje i kako je još Miroslav Krleža u svojoj drami „Aretej“ ispisao „jednu čudesnu himnu ruci“.

„Mi rukom, čovječe, mislimo. Mi rukom osjećamo. Ne možete mi oduzimati ruku, pogotovo ne možete misliti formu bez ruke“, slikovit je Karahasan.

I prema njegovom mišljenju, čovjek nije pismen ako ne zna pisati rukom. Zato mu je finska inicijativa „imbecilna, opaka i opasna“, ujedno i „još jedan korak u preseljenju svih ljudskih sposobnosti u strojeve kojima je čovjek okružen“.

Priča i kako se, svojevremeno, šalio sa studentima, nagovarajući ih da „uče neki zanat kako bi naučili misliti rukom i kako bi počeli poštovati logiku materijala“.

„Govorio sam u šali: *Kad pišem, glava mi služi samo zato da redak ne ode krivo, jer mislim rukom. Mislim u napetom odnosu između ruke, naliv pera i teke u koju upisujem tekst*“, zaključuje Karahasan.

Izvor: Al Jazeera